

响而暖或吹而寒或强而益或羸而損或載而成或隳而毀
皆物之自然勢之不免者也愚人私己而務得迺欲拒而違
之其禍不覆則折惟聖人知其不可逆則順以待之去其甚
去其奢去其泰使不至於過而天下無患矣董思靖曰聖人
知事勢之相因亦理之常故任之自然而不使之盈且過也

右第二十五章

以道佐人主者不以兵强天下其事好還

王氏曰以道佐人主尙不可以兵强天下况人主躬於道者
乎蘇氏曰聖人用兵皆出不得已非不得已而欲以强勝天
下雖或能勝其禍必還報之楚靈齊湣秦皇漢武或以殺其
身或禍其子孫人之所毒鬼之所疾未有得免者也

道藏輯要

道德真經註

三

心集十

師之所處荆棘生焉大軍之後必有凶年

政和注曰下奪民力故荆棘生上違天時故有凶年蘇氏曰
兵之所在民事廢田不修用兵之後殺氣勝年穀傷凡兵皆
然况以兵强天下耶

善者果而已不敢以取强果而勿矜果而勿伐果而勿驕果而
不得已是謂果而勿强

兵之善者果决於一時以定亂而已不敢阻兵弗戢以取勝
而爲强也蘇氏曰勿矜勿伐勿驕不得已四者所以爲勿强
也

物壯則老是謂不道不道早已

有道者常如嬰兒孺子故能不老而長年若壯則必老此不道者也不道者早已言其不能久也蘓氏曰壯之必老物無不然惟有道者成而若缺盈而若冲未嘗壯故未嘗老未嘗死以兵強天下壯亦甚矣能無老乎

夫佳兵者不祥物或惡之故有道者不處也

佳猶云嘉之也不祥謂無吉慶而有凶災也不處謂不肯以此處身也

君子居則貴左用兵則貴右

此指言不處之實不處平日所貴之位而處所不貴之位不

道藏輯要

道德真經註

三五

心集十
川十

肯於用兵之位處身也

兵者不祥之器非君子之器不得已而用之恬淡爲上勝而不美

謂其殺人迺凶災之器非吉慶人所用之器也恬者不歡愉淡者不濃厚謂非其心之所喜好也爲上謂不好用兵迺爲可尙也勝而不美謂兵雖得勝亦不肯以爲美事

美之者是樂殺人也樂殺人者不可以得志於天下矣

此推言不美若以戰勝爲美事是以殺人爲樂也不可以得志於天下要終而言之以示戒

吉事尙左凶事尙右偏將軍處左上將軍處右

此又申言上文不處之意

殺人眾多以悲哀泣之戰勝以喪禮主之

此又申言上文不美之意

右第二十六章

道常無名

此言道也

樸雖小天下不敢臣侯王若能守萬物將自賓

樸指道言道彌滿六合而斂之不盈一握故曰小至尊者道
故人之體此道者可以君天下而天下不敢臣之侯謂一國
之君王謂天下之君若能守此道則萬物尊之爲主而將自

道藏輯要

道德真經註

美

心集十

賓矣自者非我欲其如此而彼自如此也

天地相合以降甘露人莫之令而自均

道之功普遍於天下譬如天地之氣相合而降爲甘露雖無
人使令之而自能均及於萬物萬物生畜於此道之中故有
道者可以爲萬物之主而萬物咸賓焉蘇氏曰甘露被於萬
物無不均徧聖人體道以應諸有亦如露之無不及者故能
賓萬物也

始制有名

此言德也始者道也制制作也猶言爲也有名者德也道無
名自道而爲德則有名也